

# t Herenhoentien



## **BESTE KIENDER!**

Et is zommer! Nog even, en dan hebben we allegere weer vekaansie. Wi'j kieken daor best naor uut, jim dan? Lekker vot of misschien gezellig thuus, zommervekaansie is altied heerlijk!

In dit Herenhoentien kuj' ok van alles vienen wat mit de zommer of mit de vekaansie te maeken het. Aachterop et kraantien ziej' onderan vier herenhoenties. Zi'j hebben ok vekaansie en bin drok an et vliegeren. Ze hebben allegere een touwgien om ien van heur poties om zo de vlieger vaaste te holen. An de ere kaante van elk touwgien zit een vlieger, kiek mar. Mar now bin jammer genoeg de vliegers een betien mit mekeer in de kneupe wi'jd. En now weten de herenhoenties niet percies meer welke vlieger van wie is. Kun jim dat es evenpies veur oons uutzuken?

Op diezelde bladziende ziej' in de midden een bloeme mit daorin twie vliegers. Ze lieken haost wel geliek, mar toch bin d'r acht verschillen. Kun jim die acht verschillen vienen?

In et Herenhoentien zitten dit keer twie inlegvellen. Van et iene kuj' een prachtige mobile maeken. Hoe dat percies moet staot bovenan op et ere inlegvel te lezen. Op dat ere inlegvel is ok nog een lietien te vienen. Dat gaot over een joongien en een maegien die in de vekaansie vaeke even naor een boer bi'j heur in de buurt gaon. Die boer het een peerd, zie, en daor meugen ze wel es even op. Misschien kun jim et lietien wel een keertien zingen op schoele!

En et verhael van Piepmoes dan, zullen jim misschien daenken. Staot dat d'r dit keer niet in? Jaowel heur, en hi'j beleeft netuurlik ok now weer een spannend aeventuur. Et verhael begint weer mitien op de volgende bladziende; laot et je mar gauw es veurlezen. Wi'j weensken jim veul plezier mit dit Herenhoentien en vanzels een hiele fijne zommervekaansie!



*'t Herenhoentien is veural bedoeld veur groep 1, 2, 3 en 4 van et basisonderwies in de Stellingwarven en verschient vier keer in et jaor. Et wodt bedocht, saemensteld en klaormaekt deur Sietske Bloemhoff en Gery Scholten, in opdracht van de Intergemientelike Begeleidingsgroep Hiemkunde in Oost- en West-Stellingwarf.*

## **PIEPMOES HET VEKAANSIE**

*Een veurleesverhael van Sietske Bloemhoff*

Op een morgen wodt de molle wakker. De molle is de buurman van Piepmoes, dat weten jim vast nog wel. Hi'j rekt him es evenpies goed uut, wrift de slaop uut de ogen en dot die dan eupen.

Nuver, daenkt de molle, et vuult nog zo vroeg. Duuster is et in zien huus dag en naacht, hi'j woont ommes onder de grond. Hoe laete zol et aenlik wezen? De molle knipt de laampe an en kikt op zien wekker. Hedenhitskes, et is nog mar zes ure in de morgen, waarom is hi'j now al wakker.

Inienend heurt hi'j een geluud. Klop, klop, klopperdeklop. En even laeter nog een keer: klop, klop, klopperdeklop. Dan is et een posien stille, mar even laeter begint et geklop opni'j.

Dáór bin ik wakker van wodden, snapt de molle. Mar wat is dat veur geklop. Et is niet an mien deure, mar et is wel in de buurt. De molle stapt van bedde, hoolt even een nat washaantien om de snute en trekt de kleren an.

'Eerst even butendeure kieken,' mompelt hi'j dan. 'Ik wil eerst weten wat veur geklop as dat is, en dan gao 'k wel eten.'

As hi'j krek boven de grond is, heurt hi'j et geklop weer. Et kon wel bi'j Piepmoes wegkommen. Wat is die moes in vredesnaeme zo vroeg in de morgen an et doen? De molle besluit om mitien te kieken wat as d'r an de haand is.

Bi'j et kesteel van Piepmoes zicht hi'j dat de deure van et schuurtien waegenwied losstaot. En daor komt et geklop ok weg. Luuster mar es goed, dan heuren jim et misschien ok wel. Klop, klop, klopperdeklop. En nog es weer: klop, klop, klopperdeklop.

As hi'j et schuurtien instapt, zicht de molle wat as Piepmoes an et doen is. Piepmoes is an et timmeren. De moes het een grote haemer in de haand en naost him staot een poede vol mit spiekers.

'Goeiemorgen, buurman,' zegt de molle tegen de moes. 'Waar bin ie toch zo vroeg in de morgen mit an de gang?'

'Hee, molle,' antwoordt Piepmoes opgeruimd. 'Ik bin an et timmeren, ik maek een boot, ziej' wel? Et is ja vekaansie en now wol ik te veren op de Lende. Mar ik had gien boot, dus docht ik vande-morgen vroeg, d'r uut, dan maek ik d'r zels iene.' Mitien haemert hi'j weer een riegel spiekers in de boot. 'Nog even en de boot is klaor. Wil ie mi'j dan wel helpen om him naor de Lende te slepen?'

'Da's goed,' zegt de molle, 'mar dan gao 'k gauw nog even naor huus, want ik moet nog eten, zie.'

As de molle een schoffien laeter weer bi'j et kesteel komt, het Piepmoes de boot klaor. Hi'j zit d'r trots naor te kieken.

'Hoe vien ie mien boot, molle?' vragt hi'j, 'is et niet een prachtboot?'

'Ja now,' pocht de molle mit de moes mit. 'Ik heb nog nooit zoe'n mooie boot zien, Piepmoes. Mar is hi'j wel goed waeterdichte?' De molle twiefelt toch een betien kuj' wel heuren.

'Netuurlik is hi'j waeterdichte,' mient de moes. 'Kiek mar, d'r is nargens een gattien te zien. Nee, dat zit wel goed molle, zit mar nargens over in. Mien boot is zo veilig as wat.'

Dan gaon de beide burenen an de slag om de boot naor de Lende te trekken. Dat vaalt nog hielemaole niet mit, want hi'j is best zwaor. En in de paeden naor de Lende toe zitten allegere hulten en bulten. Mar nao een uurtien kommen ze toch bi'j de Lende an en drokken veurzichtig de boot et waeter in. Piepmoes wil vanzels zo gauw meugelik veren. In de bos het hi'j een peer geschikte stokken vunen om mit te roeien. Kerdaot stapt de moes de boot in en staot as een echte kaptein om him henne te kieken. Hi'j is heer en meester van zien schip, wat daenken jim!

'Hej' gien nocht om mit te gaon, molle?' vragt hi'j an zien buurman.

'Nee, Piepmoes,' zegt die. 'Ik heb now ienkeer gien zeebienen. Mar weej' wat, ik waacht hier wel op jow. Dan gao ik zo lange noflik in et zunnegien liggen te soezen.'

Daor dobbert Piepmoes al henne. Et roeien gaot him eerst nog niet zo best of, en de boot schommelt

geveerlik henne-weer. Mar nao een posien gaot et een stok beter. De moes zwaait nog es naor de molle en raost dat et poerbest gaot.

Een schoffien laeter dri'jt de moes him es omme om te kieken hoe veer hi'j is. Aj' roeien, zit ie ommes mit de rogge naor de kaant toe die aj' opveren.

'Ik gao disse eerste keer an dat gindse broggien toe, daor bi'j dat wallegien,' mompelt de moes in himzels. 'A'k daor dan onderdeur bin, gao 'k even an laand en dan veer ik weer weeromme.'

'Wat een heerlijk weertien, niet Klaos,' spint Miep tegen de zwatte kaeter mit de witte punte op de stat. 'En wat een mooi plakkien, hierzo in et wallegien.'

'Zeg dat wel, Miep,' vint Klaos. 'Dat he'k toch mar mooi veur oons uutzocht. Zuwwes zo es evenpies over dat broggien lopen om te kieken as d'r an die kaant van de Lende ok nog wat te eten is? Ik heb zo staorigan wel zin an wat, ieje dan?'

Now, Miep lust ok wel wat. Miep lust aenlik altied wel wat, krek as Klaos. Dat ze stappen overaende en toffelen naor et broggien toe.

'Oe here, moej' daor es zien,' zegt Miep tegen Klaos, en gefst de kaeter een por. 'Daor komt een botien an veren, en kiek es wie d'r in dat botien zit. Oons eten veur vandaege!'

Ja heur, jim hebben et al deur. De katten zien et botien mit Piepmoes ankommen. En de moes het niks in de gaten. Die zit een betien bange naor de bojem van de boot te kieken, waor een betien waeter deurhenne siepelt. Hoe kan dat now, daenkt Piepmoes, de boot is zeker toch een betien lek. Was de molle now mar mitgaon, dan had die et waeter d'r uutscheppen kund. Ik zal perberen da'k an et broggien toe kom, dan loop ik wel weeromme. De moes dri'jt him omme om te kieken hoe veer hi'j is en schrikt him een hoetien. Hi'j is al vlakbi'j et broggien, mar hi'j zicht ok wie as daor op staon. De katten. En ze wrieven heur in de poties en slikken heur om de mond.

'Ha, die Piepmoes,' mierken ze. 'Now ontkom ie oons niet, now pakken we jow en eten je op!'

Klaos en Miep staon al veurover om Piepmoes te griepen. Et moesien perbeert uut alle macht de boot te keren om zo an de katten te ontkommen. Mar et lokt him niet. Langzem drift et moesien in de richting van de kateklauwen...

Dan gaot inienen de boot van Piepmoes een aentien omhogens en vligt as et waore de ere kaante uut. Vot van de brogge en de katten, de kaant van de molle op. Et gaot verschrikkelijk hadde. Et liekt wel as zit Piepmoes in een speedboot. De katten staon hielendal verstuiverd op de brogge te kieken. De mond hangt heur d'rvan eupen. Ze snappen d'r niks van. Jim dan? D'r is nóg iene die d'r niks van snapt. En dat is de molle. Hi'j zicht de boot mit een rotgang ankommen en begriipt niet dat Piepmoes zo hadde roeien kan. Piepmoes snapt d'r trouwens zels ók niks van.

As de boot an de molle toe is, zakt hi'j weer naor beneden in et waeter en blijft dan liggen. Dan begint et waeter naost de boot een betien te brobbelen en stikt d'r zomar een vissesnute naor boven. Et is een snoek. Hi'j kikt Piepmoes en de molle es an, schuddet et waeter van zien snute en zegt:

'Zo jonges, wat zeggen jim, kan ik veren of niet?'

'Och heden, snoek,' piept Piepmoes. 'Ie hebben mien leven redded, wat bin ie een poerbeste snoek!'


'Ik had zoe'n betien in de gaten wat ie van plan weren, Piepmoes,' vertelt de snoek. 'Ik zwom hier al een posien in de ronte. Mar ik wus ok dat de katten bi'j et wallegien laggen. En ik hadde al es van jim kammeraod de kikkerd heurd hoe vervelend die soms wezen kunnen. Dus bin 'k de hieltied mar een betien bi'j jow in de buurt bleven, zie. En ik vertrouwde jow botien aenlik ok niet zo...'

'Wat bin ik bliede dat ie d'r weren, snoek,' zegt Piepmoes. 'Ik weet niet hoe 'k je bedaanken moet. Weej' wat? Ik trakteer je bi'jkotten op een lekker pottien mit vissevoer!'

'Da's goed, Piepmoes,' vint de snoek. 'Mar aj' weer es veren willen, geef mi'j dan mar een seintien, dan meuj' wel bi'j mi'j op de rogge. Dat is veul veiliger as mit jow boot, kiek mar!'

As Piepmoes en de molle de kaant opkieken daor de vis naor toewist, zien ze wat hi'j bedoelt. Ze zien nog krek et laeste tippien van Piepmoes zien timmerkeunsten onder waeter verdwienen...

Van wie is welke vlieger?



de beide vliegers bin haest  
geliet, doch bin d'r acht  
verschillen hun spin  
die vlieten spin




## ET MAEKEN VAN DE VLINDERMOBILE

Bi'j et maeken van de mobile kuj' et beste eerst de onderdielen mooi kleuren of varven. Aj' dat daon hebben, moej' alle onderdielen, zo netties aj' kunnen, uutprikken of knippen. Van de kleinste vlin-ders vouw ie de vleugels een betien omhogens. Et middelste diel, dat is et liefien van de vlinder, plak ie op et midden van elk van de grote vlin-ders. De vuuf vlin-ders bin now klaor. Iene van de vlin-ders plak ie vervolgens boven op et rontien. De boverkaante van de mobile, waar de vier aandere vlin-ders an kommen te hangen, is now ok klaor. Prik dan een gattien in elke zwatte stippel, viere in de raand van et boverste diel van de mobile, iene in de midden daorvan en deur elke vlinder iene. Om de vlin-ders an de mobile te hangen, hej' vier draoties neudig, twie wat langere en twie kottere. Deur elke vlinder komt ien van die draoties. An de onderkaante van de vlin-ders maek ie een kneupien in et draotien, zodat de vlinder d'r niet meer ofgleden kan. Dan doej' de ere aenties van de draoties deur de vier gatties an de raand van de mobile, van onderen naor boven toe en maeken daor ok weer een kneupien in. Tot slot hej' nog een draotien neudig om de mobile mit op te hangen. Doe dat draotien deur et gattien in de midden van de mobile en maek an de onderkaant weer een kneupien. De mobile is now hielemaole klaor en ie kun him ophangen!

\*\*\*\*\*  
 \*\*\*\*\*  
 \*\*\*\*\*

### JAN EN JET


Tekst: Harm Houtman  
 Mez.: S.A. Bloemhoff




Tan ta-ra tan ta-ra tan... Daor gaot  
 Tet te-re tet te-re tet... Daor gaot



klei-re Jan. Mit zien ni' je klompies an.  
 klei-re Jet. Mit heur rooie au-to-ped.



Oe, wat doen die bei-de stoer! Now, ze gaon ok



naor Jan Boer! Bij de peerden in et



laand, mit een klon-tien in de haand!

### Jan en Jet

refrein:

Tan tara tan tara tan...  
 Daor gaot kleine Jan.  
 Mit zien ni'je klompies an.  
 Tet tere tet tere tet...  
 Daor gaot kleine Jet.  
 Mit heur rooie autoped.

1. Oe, wat doen die beide stoer!  
 Now, ze gaon ok naor Jan Boer!  
 Bi'j de peerden in et laand  
 mit een klontien in de haand.
2. Oe, wat kieken ze verheerd,  
 want ze meugen op een peerd!  
 't Peerd dat lopt meraokel rap,  
 in de Pippi-Langkous-stap!
3. Mar et duurt heur vuus te kot.  
 Jan en Jet moe'n al weer vot.  
 Jan Boer zegt, dat et wéer mag.  
 Morgen komt een ni'je dag!

